



Il parsura dal cussegl grond Michael Pfäffli, durant ses pled d'avertura.

FOTO M. HARTMANN

Il turissem duess turnar tar sias ragischs

Pled d'avertura per la sessiun d'avrigl

■ **(anr/fa) Per che la branscha economica principala dal Grischun haja success era en l'avegnir dovri occurrenz che sveglian interess sur ils cunfins or. Ils fundaments dal turissem èn «prestar» e «servir».** En ses pled d'avertura ha tematisà il president dal cussegl grond *Michael Pfäffli* il turissem. Era, sche la situaziun cun la naiv n'è stada era quest enviern betg simpla resulta da las emprimas cifras davart la stagiun passada in optimissem modest. «È quai malgrà las cundiziuns generalas, sco il franc svizzer ferm, las infrastructures turisticas che stuessan vegnir renovadas e la difficultad da chattar collavuratur indigens». El ha constatà che la branscha turistica davena pli e pli cunscenta ch'ella saja, tenor

definiziun, ina branscha da prestaziuns da servetschs. «Ses fundaments èn prestar e servir, e la cumbinaziun da questas duas activitads porschan era novs spazis creativs che pon esser tant inspirants sco era pretensius.» Pfäffli ha concess che sias constataziuns sajan plitgusch subjectivas. «Ils campiunadis mundials da skis alpins 2017 a San Murezzan ch'èn stads ina prestaziun da servetschs exquisita mussan però che mia constataziun na po esser uschè faussa.» Per avair success er en avegnir dovri a ses avis ulteriurs da quests gronds arranschaments che fetschian buna recloma per il tut il chantun. Per realisar talas occurrenz dovri tenor el sper ils organisatur era il sustegn da differents partenaris, dal militar fin tar ils voluntaris. «Cuminaivelmain vegnan en quels

cas furnidas prestaziuns maximalas ch'èn en l'interess d'in lieu, d'ina regiun, dal chantun e da la Svizra», ha ditg il president dal parlament grischun, «per che l'elan naschì tar ils campiunadis en Engiadin'Ota na tschessia betg dovri cuntinuaziuns, ulteriurs events en il Grischun.» Ch'il turissem grischun haja sco furnitur da prestaziuns da servetsch l'abilitad, «ma er la forza e la voluntad» da dumagnar events multifars, schizunt independents da las stagiuns. Pfäffli ha punctuà che quels na duessan però esser en dimensiuns pli grondas ch'ils campiunadis mundials a San Murezzan: «Areguard las dimensiuns ha il suveran grischun tratg avant dus mais ina lingia cotschna e ditg na a l'idea d'ina Olimpiada en noss chantun.»